

Inatsisartut suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut apeqqut:**

1. Kangerlussuarmi mittarfiup iluarsaanneqarnissaanut missingersuusiornissamut piffissamullu pilersaarusiornissaq (byggeprogram) Mittarfeqarfinniit qanga aallartinneqarpa?
2. Pilersaarusiorneq qanittumi aatsaat aallartinneqarsimappat, sooq taamak kingusitsigisumik aallartinneqarpa? Tassami illersornissaqarfik Naalakkersuisullu Kangerlussuup mittarfiata atuinnaarnissaanik tunngavisumik 18. september 2019-imili isumaqatigiissuteqarnikuupput.
3. Pilersaarusiorneq qanoq akeqarnissaa ilanngullugu qaqugu naammassissava?
4. Pissusissamisoornerussanngila Kangerlussuarmi mittarfiup iluarsaanneqarnissaa Naalagaaffiup/illersornissaqarfup akilertussaammagu, Mittarfeqarfinniit pilersaarusiorfigineqarani Naalagaaffimmiit nammineq pilersaarusiorfigineqaruni?
5. Naatsorsuinerit suminngaanneersut kikkunniillu suliarineqartut tunngavigalugit Kangerlussuarmi mittarfiup atuinnaarneqassappat 800 mio. kr. aningaasartuutigineqartussatut missingiunneqarpat?
6. Kiap aningaasartuutissatut missiliuut suliaraa.
7. Sakkutuunngorniarnissamut taarsiullugu upalungaarsimanermut tunnganerusunik ilinniartitaanissat Naalakkersuisut kissaatigineqarnerummata, taava upalungaarsimanermut ilinniartitaanerit pilersaarusiorfigineqarpat?
8. Taamaassimappallu qaqugu aallartinneqarnissaat Naalakkersuisut ilisimatitsissutigisinnaavaat?
9. Videumi ataani 17. juni 2021-imik ullulernerqarsimasumi minuttit 10:34 aamma 11:03 akornanni isiginnaarneqarsinnaasumi Nunanut Allanut Naalakkersuisumit Kangerlussuarmi sakkutuunngorniarnermut ilinniartitaanermut atatillugu oqaatigineqartut, tamatuma "inunnik toqoraanissamik ilinniartitsineruneranik" oqaatigineqartut Naalakkersuisut uppersarsinnaavaat:  
<https://www.facebook.com/politik.gl/videos/4336632986361315>
10. Naalakkersuisut uppersarsinnaavaat Naalakkersuisuusimasut siuliisa siunertarisimagaat aammalu isumaqatigiissutigisimagaat qallunaat ministeriinut, Kangerlussuarmi "inunnik toqoraanissamik ilinniartitsinnissamik" massakkut Nunanut Allanut Naalakkersuisup oqarnera malillugu aallartitsisoqarnissaa siunertaralugu?

**Tunngavilersuut:**



Inatsisartut suleriaasiat §37 atorlugu apeqquteqaatinni Naalakkersuisut akissutaat: 2021 -062 aallaavigalugit maanna apeqquteqaqqinnissannut pissusissaqarlersippaanga.

Tassanimi akissuteqaatigineqartumi apeqqut 3 imatut Naalakkersuisut akissuteqarput “Tamatum kingorna Mittarfeqarfiit sanaartornermut pilersaarummik, pilersaarusionermut, tassungalu missingersuusionissamut piffissamullu pilersaarusionissamut tunngaveqarsinnaasumik suliaqarlutik **aallartipput**” Tassa imatut aamma paasineqarsinnaalluni, suliaq aatsaat qanittumi aallartittoq, naak september 2019-imili isumaqatigiissut tunngavilerneqareeraluartoq. Taamaattumik tamatumunnga suna aammalu kikkut suliamik kinguarsaasimanersut paaserusunnarsilluni.

Tamatuma saniatigut videumi ulloq 17. juni 2021-meersumi oqaaseqaatit Nunanut Allanut Naalakkersuisumit saqqummiunneqartut Naalakkersuisunit uppersarneqarlutilluunniit ilumuunnginnerarneqarnissaat kissaatiginarpoq.

Kissaatigaara apeqquteqaatikka ullut suliffiusut qulit qaangiutinnagit akineqassasut.